

Հ ա ս տ ա տ վ ա ծ է`

«Ճարտարապետության և շինարարության
Հայաստանի ազգային համալսարան» հիմնադրամի
գիտխորհրդի 2015թ. մայիսի 27-ի նիստում
Արձանագրություն N° 01-05/15
գ ի տ խ ո ռ հ ը ղ ի ն ա խ ա զ ա հ , ո ե կ տ ո ռ `

Գ.Շ. Գ ա լ ս տ յ ա ն

Կ Ա Ր Գ

«ՃԱՐՏԱՐԱՊԵՏՈՒԹՅԱՆ ԵՎ ՇԻՆԱՐԱՐՈՒԹՅԱՆ ՀԱՅԱՍՏԱՆԻ ԱԶԳԱՅԻՆ ՀԱՄԱԼՍԱՐԱՆ» ՀԻՄՆԱԴՐԱՄԻ ՍՈՎՈՐՈՂՆԵՐԻ ԶՈՒԳԱՀԵՌ ՈՒՍՈՒՑՄԱՄԲ ԵՐԿՐՈՐԴ ԱՅԼ ԲԱՐՃՐԱԳՈՒՅՆ ՄԱՍՆԱԳԻՏԱԿԱՆ ԿՐԹՈՒԹՅՈՒՆ ՍՏԱՆԱԼՈՒ ՄԱՍԻՆ

I. Ընդհանուր դրույթներ

1. «Ճարտարապետության և շինարարության Հայաստանի ազգային համալսարան» հիմնադրամի (այսուհետ` Համալսարան) զուգահեռ ուսուցմամբ երկրորդ այլ բարձրագույն մասնագիտական կրթություն ստանալու մասին կարգը մշակված է Հայաստանի Հանրապետության Սահմանադրության, Հայաստանի Հանրապետության «Կրթության մասին», «Բարձրագույն և հետբուհական մասնագիտական կրթության մասին» օրենքների, Համալսարանի կանոնադրության և այլ իրավական ակտերի հիման վրա:
2. Սույն կարգն ուղղված է անձի նախասիրություններին համապատասխան երկաստիճան բարձրագույն մասնագիտական կրթություն ստանալու իրավունքի իրականացմանը, ապահովմանը, պաշտպանությանը և մատչելիությանը և սահմանում է Համալսարանում զուգահեռ ուսուցմամբ երկրորդ այլ բարձրագույն մասնագիտական կրթություն ստանալու ընդհանուր պայմանները:
3. Զուգահեռ ուսուցմամբ երկրորդ այլ բարձրագույն մասնագիտական կրթությունը կազմակերպվում է կրեդիտային համակարգով:
4. Զուգահեռ ուսուցմամբ երկրորդ այլ բարձրագույն մասնագիտական կրթություն ստացող ուսանողների դասացուցակները կազմվում են այնպես, որ չխանգարեն հիմնական կրթության պարապմունքների անցկացմանը:

II. Զուգահեռ ուսուցմամբ երկրորդ այլ բարձրագույն մասնագիտական կրթություն ստանալու իրավունք ունեցող անձինք

5. Համալսարանում զուգահեռ ուսուցմամբ երկրորդ այլ բարձրագույն մասնագիտական կրթություն կարող են ստանալ Համալսարանի բակալավրիատի ու մագիստրատուրայի ծրագրերով, տարբեր մասնագիտություններով առկա և հեռակա ձևով սովորողները.
ա/ առկա ձևով սովորողները` Համալսարանի հեռակա ձևով ուսուցման համակարգում,
բ/ հեռակա ձևով սովորողները` Համալսարանի առկա ձևով ուսուցման համակարգում:
6. Առաջին կուրսում սովորողներին զուգահեռ ուսուցմամբ երկրորդ այլ բարձրագույն մասնագիտական կրթություն ստանալ չի թույլատրվում:
7. Զուգահեռ ուսուցմամբ երկրորդ այլ բարձրագույն մասնագիտական կրթությունն իրականացվում է միայն վճարովի հիմունքներով:
8. Զուգահեռ ուսուցմամբ երկրորդ այլ մասնագիտական կրթություն ստանալը թույլատրվում է այն կիսամյակից, որում առարկաների, կրեդիտների, ժամաքանակների 25 տոկոսից ավելի տարբերությամբ պայմանավորված ստուգարքների և քննությունների քանակը, հաշվի առնելով Համալսարանի մասնագիտությունների առանձնահատկությունները ըստ տվյալ կիսամյակի, չի գերազանցում 8 /ութը/:
9. Զուգահեռ ուսուցմամբ երկրորդ այլ բարձրագույն մասնագիտական կրթություն ստանալու հավակնորդի տարբեր պատճառներով գոյացած, ինչպես նաև ընդունելության քննությունների առարկայական տարբերությունները և առարկաների առանձին բաժինները /ուսումնական պլանների, առարկայի ժամաքանակի տարբերություններ, չհանձնած քննություններ և ստուգարքներ/ համարվում են ակադեմիական պարտքեր: Ուսանողը գոյացած տարբերությունները` քննություններն ու ստուգարքները, հանձնում է Համալսարանի կողմից սահմանված անհատական ժամանակացույցով, որը սահմանվում է մինչև տվյալ կիսամյակի պարապմունքների ավարտը:
10. Զուգահեռ ուսուցմամբ երկրորդ այլ բարձրագույն մասնագիտական կրթություն ստանալու դեպքում առարկայական տարբերության ցանկի ստուգարքների և քննությունների թվաքանակում հայագիտական և ընդունելության բազային քննական առարկաները չեն ընդգրկվում:

III. Զուգահեռ ուսուցմամբ երկրորդ այլ բարձրագույն մասնագիտական կրթություն ստանալու կարգը

11. Զուգահեռ ուսուցմամբ երկրորդ բարձրագույն մասնագիտական կրթություն ստանալու համար սովորողները դիմում են Համալսարանի ռեկտորին: Դիմումները ներկայացվում են կիսամյակի ուսումնական պարապմունքներին (առկա կամ հեռակա) նախորդող և հաջորդող երկու շաբաթվա ընթացքում: Դիմումներին կից ներկայացվում են.

ա/ սովորողի ուսուցված առարկաների վերաբերյալ՝ դեկանի կողմից վավերացված տեղեկանք և վկայականի լուսապատճենը,

բ/ 4 լուսանկար 3X4 չափսի և անձնագրի լուսապատճենը:

12. Դիմումները քննարկվում են կիսամյակների ուսումնական պարապմունքներին նախորդող և հաջորդող երկու շաբաթվա ընթացքում՝ հավակնորդների ատեստավորման հանձնաժողովում:

13. Համալսարանի ռեկտորը կազմում և նախագահում է հանձնաժողովը: Հանձնաժողովի կազմում ընդգրկվում են.

ա/ Համալսարանի ուսումնական աշխատանքները համակարգող պրոռեկտորը՝ տեղակալ,

բ/ իրավաբանական բաժնի վարիչը՝ քարտուղար,

գ/ համապատասխան ֆակուլտետի դեկանը,

դ/ համապատասխան առարկայի, մասնագիտական ամբիոնի մասնագետը /մասնագետներ/,

ե/ ուսանողական խորհրդի ներկայացուցիչը:

14. Հանձնաժողովի նիստերի արձանագրությունն ստորագրում են հանձնաժողովի նախագահը, քարտուղարը և հանձնաժողովի նիստին մասնակցած անդամները:

15. Ատեստավորման հանձնաժողովում դիմումները քննարկելուց հետո հավակնորդի դիմումը բավարարելու դեպքում, որոշվում է ուսանողի ընդունման ժամկետը, կուրսը և ակադեմիական խումբը կամ պատճառաբանված որոշմամբ մերժվում է դիմումը:

16. Մինչև ատեստավորման հանձնաժողովում դիմումի քննարկումը, Համալսարանի ռեկտորը կարող է հավակնորդին թույլատրել մասնակցելու Համալսարանի համապատասխան ակադեմիական խմբի պարապմունքներին:

17. Համալսարանի ռեկտորը ատեստավորման հանձնաժողովի դրական եզրակացության հիման վրա հրաման է ստորագրում սովորողին համապատասխան կուրս ընդունելու մասին:

18. Համալսարանում սովորողին տրվում է համապատասխան ստուգաբային գրքույկ:

19. Համալսարանում ուսումնառության ընթացքում զուգահեռ երկրորդ այլ բարձրագույն մասնագիտությամբ սովորողի նկատմամբ տարածվում են Համալսարանի կանոնադրությունը, ներքին կարգապահության կանոնները, Համալսարանում «Վճարովի հիմունքներով սովորողների ուսման վարձի վճարման մասին» կարգը և ներհամալսարանական այլ ակտերը:

IV. Եզրափակիչ դրույթներ

20. Սույն կարգը հաստատվում, փոփոխվում և լրացվում է համալսարանի գիտական խորհրդի որոշմամբ:

21. Սույն կարգն ուժի մեջ է մտնում Համալսարանի գիտական խորհրդի որոշումը համալսարանի ռեկտորի կողմից հաստատվելուց հետո տասներորդ օրը:

22. Սույն կարգն ուժի մեջ մտնելուց հետո ուժը կորցված է համարվում «Երևանի ճարտարապետության և շինարարության պետական համալսարանի սովորողների գուգահեռ ուսուցմամբ երկրորդ այլ բարձրագույն կրթություն ստանալու մասին» ժամանակավոր կարգը:

Գիտական քարտուղար՝

Լ.Ն. Լևոնյան

27 մայիսի 2015թ.

գիտխորհրդի արձանագրություն N° 01-05/15